

# SOLENITÂT de SENSE dal SIGNÔR

Jutoris pe Liturgjie

Domenie, ai 28 di Mai dal 2017

*La fieste de Sense, che e vignive simpri di Joibe a corante dîs dopo Pasche, e jere une vore sintude tai nestrîs paîs, simpri compagnade des Rogazions pe benedizion de campagne in flôr. I anzians a ricuardin benon chês processions matutinis par straducis e troîs, preant ducj i Sants dal Paradîs e invocant che: "La benedizion di Diu onipotent e dismonti su lis monts, su lis malghis, su lis staipis, sui boscs sui cjamps, sui prâts, sui orts"...*

*A son paîs, sore dut in Cjargne, li che lis rogazions a continuin a sedi une vore sintudis e partecipadis.*

*La solenitât de Sense e reste peade, par usance vielonone, ancje a la "bussade des crôs" a s. Pieri di Cjargne.*

*Nissun al à il dirit di butâ di bande lis tradizions, baste che no vebin a diventâ folclôr; par ogni fieste e par ogni usance e reste simpri la domande di fonde: "Ce mes mi puartie cheste zornade e celebrazion?"*

*La Sense nus cjacare di "assension": Gjesù si alçà par aiar sot i lôr vôi e un nûl ur al strafuì dai lôr vôi. Luche, massime tai Ats dai Apuestui nus conte il fat cun bondance di particolârs, ma ancje Matieu e s. Pauli a mût lôr nus rivelin il sens di chest event e misteri.*

*La Sense e je la glorificazion di Crist, come che nus pandarà l'Apuestul te seconde leture di vuê. Chel Gjesù: "Ecce homo" - E ur dîs: "Velu l'om" (Zn 19, 5) che o vin cognossût tal Vinars sant al è il stes Gjesù che vuê al è sentât a la diestre di Diu insomp dai cîi.*

*In lui al è platât e si rivelarà ancje il misteri di ogni om, di ogni femine, di ogni miserie-tragedie, di ogni Ecce homo; in lui, te sô sense si cjate za il destin che nus spiete parcè che, come Gjesù, o sin ancje nô saltâts fûr di Diu e a Diu o tornarìn (cfr. Zn 13, 3).*

*O podìn ben dî: realtâts tant plui grandis di nô.*

## Antifone di jentrade

At 1,11

**U**mign di Galilee, parcè po staiso li a cjalâ il cîl?

Come che lu vês viodût a lâ su viers il cîl,  
cussì al tornarà, aleluia.

**Si dîs** Glorie a Diu.

## Colete

Diu onipotent, fasinus gjoldi di sante contentece  
e cuntun agrât plen di religjon,  
parcè che la sense di Crist to Fi e je ancje la nestre  
e là ch'e je rivade la glorie dal cjâf,  
li al è clamât a sperâ ancje il cuarp.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

## O ben:

Diu onipotent, a nô ch'o crodin  
che come vuê il to Unigjenit e nestri Redentôr  
al è lât sù intai cîi;  
danus, par plasê, di vivi ancje nô lassù cul nestri cûr.  
Lui ch'al è Diu  
e cun te al vîf e al regne dutune cul Spirtu Sant,

par ducj i secui dai secui.

## PRIME LETURE

At 1,1-11

Si è alçât par aiar sot i lôr vôi.

*Luche nus mene insiemei cui apuestui tai corante dîs dopo de resurezion di Gjesù. Nus puarte a scoltâ, a rifleti su lis peraulis dal Signôr e nus invade ancje nô a sostâ cjalant fis il cîl, li che un nûl ur al strafuî dai lôr vôi.*

## Dai Ats dai Apuestui

Tal gno prin libri, Teofil, o ai tratât di dut ce che Gjesù al à fat e insegnât, di cuant ch'al à scomençât fint in chê di ch'al è stât puartât sù in cîl, dopo di vêur dât lis sôs istruzions ai apuestui che ju veve siezûts midiant dal Spirtu Sant.

Dopo de sô passion, lui si è pandût a lôr vîf, cun cetantis provis, comparintjur par corante dîs e fevelantjur dal ream di Diu. E biel ch'al mangjave cun lôr, ur à comandât di no slontanâsi di Gjerusalem ma di spietâ li ce che il Pari ur veve imprometût, «ce ch'ò vês sintût, dissal, de mê bocje: Zuan al à batiât cu l'aghe, vualtris invezit o sarês batiâts cul Spirtu Sant di chi a pôcs dîs».

Cjantansi duncje insieme, i an domandât: «Signôr, esal chest il timp che tu tornarâs a meti in pîts il ream di Israel?». Ur à rispuindût: «No us sta a vualtris di savê i timps e i moments che il Pari si à riservât par sè. Ma o cjaparês la fuarce dal Spirtu Sant ch'al vignarà parsore di vualtris e mi sarês testimonis a Gjerusalem, par dute la Gjudee e la Samarie e fint ai ultins confins dal mont».

Disint cussì, si alçà par aiar sot i lôr vôi e un nûl ur al strafuî dai lôr vôi. Intant che lui al leve sù, lôr a cjalavin fis il cîl: e ve che si ur presentin dôs personis a blanc che ur disin: «Umign di Galilee, parcè po staiso li a cjalâ il cîl? Chel Gjesù che us è stât strafuît viers il cîl, al tornarà come che lu vês viodût a lâ sù in cîl».

Peraule di Diu.

## SALM RESPONSORIÂL

dal Salm 46

*Chest struc cjapât fûr dal salm 47 nus presente ben i sentiments che a àn di compagnâ la nestre solenitât li che al è lâs sù Diu framieç dai berlis, il Signôr compagnât dal sunôr de trombe. La nestre preiere che e sedi vuê contornade di chel continui intonâ: Dait sù cjantis a Diu, dait sù cjantis; dait sù cjantis al Signôr, dait sù cjantis.*

**R. Al va sù il Signôr fra cjantis di gjonde.**

*Se cjantât: Il cjant dai salms responsoriâi, p. 46.*

**O ben:**

**R. Aleluia, aleluia, aleluia.**

Batêt lis mans, popui de tiere,  
scriulant al Signôr in ligrie.

Parcè che trement al è il Signôr des schiriis, l'Altissim,  
lui al è il grant re sun dute la tiere. **R.**

Al è lâs sù Diu framieç dai berlis,  
il Signôr compagnât dal sunôr de trombe.  
Dait sù cjantis a Diu, dait sù cjantis;  
dait sù cjantis al Signôr, dait sù cjantis. **R.**

Lui al è il re di dute la tiere:  
une biele cjante dait sù a Diu.  
Diu al à tacât a regnâ sui popui,  
Diu si è plaçât su la sô sante sente. **R.**

## SECONDE LETURE

Ef 1,17-23

**Diu al à fat sentâ Crist a la sô gjestre insomp dai cîi.**

*I events de salvece di Diu, il misteri de Sense-glorificazion di Gjesù, a son tant alts che il fruçon de nestre inteligjence nol pô rivâ. Pr chest o vin dibisugne di une sapience, rivelazion, lûs par olmâ la sperance de sô clamade,... la ricjece de sô ereditât gloriose,... la grandece spropositade de sô potence... la fuarce che lui al à pandude tal Crist... Se o domandarìn cheste sapience-lûs cun fede, il Signôr, come che lui al sa, nus e concedarà.*

### **De letare di san Pauli apuestul ai Efesins**

Fradis, il Diu dal Signôr nestri Gjesù Crist, il Pari de glorie, us dedi un spirt di sapience e di rivelazion par cognossilu miei. Ch'al inlumini i vôi de vuestre inteligjence par ch'o podês rivâ a capî quale ch'e je la sperance de sô clamade, quale ch'e je la ricjece de sô ereditât gloriose framieç dai sants, e quale ch'e je la grandece spropositade de sô potence cun nô, ch'o crodin, seont la virtût de sô fuarce invincibil che lui al à pandude tal Crist resussitantlu dai muarts e fasintlu sentâ a la sô gjestre insomp dai cîi, plui adalt di ogni principi e autoritât, potence e paronance e di ogni altri non ch'al ven nomenât no dome in chest secul culi ma ancje in chel ch'al vignarà.

Al à disponût dut ai siei pîts e lu à metût, sore dut, cjâf de glesie, ch'e je il so cuarp, la plenece di lui che dut, sot di ogni aspîet, al colme.

Peraule di Diu.

## SECUENCE

*Secuence aquileiese. Ancje culi Aquilee no dismentee un fat a jê tant cjâr: Crist che al va jù tes inferis a liberâ i presonîrs de muart. No dome, ma vuê il Fi di Diu al à fat jentrâ cun lui, tes altis sentis dal cîl, i cuarps dai mortâi.*

*Al è il câs di acetâ l'invît dai nestris vons e di compagnâ Crist cu la nestre laude.*

## SUMMI TRIUMPHUM REGIS

### **Compagnìn la vitorie dal re cu la nestre laude;**

lui che, cu la vitorie de justizie, al à tes sôs mans i bastons dal comant dal cîl e de tiere,

lui che si è dât vie a un presit une vore grant par riscatânus nô.

A lui i spiete un non convenient e gloriôs.

Di fat al à scjavaçât cence soste dutis lis monts e dutis lis culinis di Betel.

Dal cîl al è dismantât jù intun grim virgjinâl e di li tal grant mâr dal mont.

Dopo di vêlu navigât dut cu la sô potence, al à dât l'assalt al scûr trement dal flum dal infîer.

Al à savoltade la paronance di chel potent; al à gjavât fûr di li une grande schirie di int e cul so sflandôr al inlumine il mont.

Il vincidôr al à menade daûrsi la sdrume di chei ch'a jerin tignûts presonîrs li dentri, e cussi, tornât in vite, al pues aromai palesâsi ai siei servidôrs e amîs.

Vuê infin al à fat il salt plui grant, svolant par simpri sore dai nûi e dai cîi.

Il popul fedêl ch'al celebri duncje cheste grande zornade là che il Fi di Diu al à fat jentrâ cun lui, tes altis sentis dal cîl, i cuarps dai mortâi.

La int e spiete trimant il judiç ch'al vignarà,  
come che i doi agnui ur an spiegât ai fradis.  
Chest Gjesù che us è stât quartât sù in cîl,  
al tornarà a vignî, come che lu vês viodût a lâ.  
Suplichin alore ducj insieme cence mai fermâsi  
il Signôr nestri gloriôs;  
par che de gjestre dal Pari, là ch'al è sentât,  
nus mandî il Spirtu Sant.  
Ch'al sedi simpri cun nô, fint a la fin dal mont.

### **CJANT AL VANZELI**

**Mt 28,19-20**

#### **R. Aleluia. Aleluia.**

Lait e inscuelait dutis lis nazions, al dîs il Signôr.  
Ve che jo o soi cun vualtris ducj i dîs,  
fint a la fin dal mont.

**R. Aleluia.**

### **VANZELI**

**Mt 28,16-20**

**Mi è stât dât ogni podê in cîl e su la tiere.**

*E je la conclusion dal vanzeli di Matieu: Gjesù resurît e gloriôs al è tornât te sô tiere, in Galilee li che al jere vivût di puar e di perseguitât, ma ancje vuarint e liberant la sô int di ogni sorte di mâi e di miseriis. Lassant chest mont Gjesù al racomande di meti in pratiche dut ce che jo us ai ordenât. Ce nus aial ordenât? Di imparâ de sô vite, parcè che: us ai dât l'esempli par che ancje vualtris o faseis come che jo us ai fat a vualtris (Zn 13, 14).*

#### **Dal vanzeli seont Matieu**

In chê volte, i undis disepui a lerin in Galilee, su la mont, tal lûc che ur veve dît Gjesù. Viodintlu lu adorarin; cualchidun però al veve ancjemò dubits. Alore Gjesù ur fevelà disint: «Mi è stât dât ogni podê in cîl e su la tiere. Lait duncje, inscuelait dutis lis nazions, batiantlis tal non dal Pari e dal Fi e dal Spirtu Sant, insegnantjur a meti in pratiche dut ce che jo us ai ordenât. E ve che jo o soi cun vualtris ducj i dîs, fint a la fin dal mont». Peraule dal Signôr.

**Si dîs O crôt.**

#### **Su lis ufiertis**

Signôr, ti presentin cun umiltât chest sacrifici  
in memorie de sense venerabil di to Fi;  
danus la gracie che, cun chest incuintri di robis santis,  
o podìn jessi alçâts a lis realtâts dal cîl.  
Par Crist nestri Signôr.

#### **Antifone a la comunion**

**Mt 28,20**

Ve che jo o soi cun vualtris ducj i dîs,  
fint a la fin dal mont, aleluia.

#### **Daspò de comunion**

Diu onipotent e eterni,  
che tu nus lassis celebrâ i misteris dal cîl  
biel ch'o sin ancjemò su la tiere, fâs, par plasê,  
che la devozion e l'afiet dal popul cristian a tindin

là che dutune cun te e je ancje la nestre umanitàt.  
Par Crist nestri Signôr.

\* \* \*

### **Riflession di pre Antoni Beline: Crist nol bandone la storie dai omps**

In cheste fieste no podìn no lâ cul pinsîr e cul cûr in Cjargne, su la mont di s. Pieri, là che di secui si dan dongje dutis lis crôs des plêfs par un grant abraç cu la glesie mari e fra di lôr, come segnâl di chê unitât che, se e coventave une volte tun mont sierât, cumò e covente plui di simpri par sigurâ la identitât culturâl, par dâi fuarce morâl e politiche, par tignî adun chel popul...

*Vanseli par un popul, an A, p. 107*

\* \* \*

### **Cjants pal timp di Pasche**

- Crist nus da la sô lûs, *n. 158*;
- Victimae paschali laudes, *n. 159*;
- I cristians a cjantin laude, *n. 160*;
- Aleluia... O filii et filiae, *n. 161*;
- Sta legre, sante Glesie, *n. 162*;
- Christ ist erstanden, *n. 163*;
- Crist al è in vite, *n. 164*;
- Cristo risusciti, *n. 165*;
- Grosser Gott, *n. 166*;
- Al Agnel sacrificât, *n. 167*;
- Hvala veçnemu Bogu, *n. 168*;
- Te lodiamo Trinità, *n. 169*;
- Laudate Dominum *n. 170*;
- O sin resurîts a la vite, *n. 171*;
- Benedete la zornade, *n. 172*;
- Il nestri Redentôr, *n. 173*;
- Si cjanti al Pari laut in cîl, *n. 174*;
- Nei cieli un grido risuonò, *n. 175*;
- O Cristo, soldi Pasqua, *n. 176*.

### **Salm 46 : Bateit lis mans popui de tiere, *n. 251*;**

- “ 22 : Il Signôr al è il gno pastôr, *n. 241*;
- “ 94 : Vignît, batìn lis mans al Signôr, *n. 256*;
- “ 80 : Gjoldêt in Diu nestre fuarce, *n. 256*;
- “ 92 : Il Signôr al regne, *n. 258*;
- “ 97 : Cjantait al Signôr une cjante gnove, *n. 261*;
- “ 113a : Cuant che Israel dal Egjit al è jessût, *n. 265*;
- “ 113b : No a nô, Signôr, no a nô, ma al to non dai glorie, *n. 266*.

**Tal libri Hosanna**, si puedin cjatâ ancjemò altris cjants e salms adats al timp di Pasche.

\* \* \*

Celebrade la Sense e, tai timps di une volte distudât il ceri pascâl, e començave la novene al Spirtu Sant in preparazion aes Pentecostis di domenie che e ven.

Nuie nus improibis di parecjâsi ancje nô a cheste solenitât midiant de preiere, te invocazion al Spirtu Sant.

*Ven a fânus visite,  
Spirtu sant e mandinus  
i tiei rais di gracie.*

*Secuence di Pentecostis*

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*